



**PRIMEIRO  
MINISTRO**

**INTERVENSAUN SUA EXSELÊNCIA PRIMEIRU-MINISTRU  
DR. RUI MARIA DE ARAÚJO  
IHA OKASIAUN ENSERAMENTU DISKUSAUN IHA ESPECIALIDADE  
ORSAMENTU JERAL ESTADU BA TINAN 2017**

Parlamentu Nasional, Díli  
9 fulan dezembru 2016

Sua Excelência Senhor Presidente Parlamento Nacional  
Excelências Senhores Vice-Presidentes Parlamento Nacional  
Distintu Deputadu sira  
Kolega membrus Governu nian  
Povu Timor-Leste tomak,

Hau hakarak subliña no agradese forma demokratika no konstrutiva ne'ebé ita hala'o debate OJE 2017, hahu husi generalidade, iha sesaun debate sira iha komisaun eventual no mos iha debate ikus-liu iha especialidade.

Hakarak mos felisita Parlamentu Nacional ninia desizaun hodi hamosu Komisaun eventual, nu'udar forma ida hodi halo serbisu la'o lais liu, maibé nafatin mantein transparénsia no rigor ne'ebé permiti ezersisiu apresiasaun orsamentu ida ne'e sai eficaz liu-tan.

Aproveita mos atu agradese proposta ualunulu resin ne'ebé ilustre deputadu sira submete, no liu husi diskusaun franka no demokratika durante loron tolu nia laran, no ikus mai, tuir possibilidade ne'ebé iha, Governu bele acomoda, sein compromete tetu fiscal ne'ebé estabelese tiha ona, no nafatin tau importância ba kompromisu Governu niana iha área implementasaun ba programa sira, ba projetu no atividade sira hotu ba tinan 2017.

Reflesaun ne'ebé ita hala'o hamutuk iha Komisaun Eventual sai nu'udar ezersisiu ida ne'ebé flexivel no hatudu maturidade ne'ebé Parlamentu Nasional no Governu iha, hodi serbisu hamutuk atu sertifika katak osan Estadu nian utiliza duni atu hamosu kondisaun di'ak liu, ba Povu nia moris no ba Timor-Leste ninia desenvolvimentu sustentável.

Iha perspetiva ida ne'e maka Governu reitera kompromisu atu lori-ba to'o rohan kompromisu ne'ebé hala'o ona ba ninia mandatu, no atu nafatin dudu ba oin progresu hirak ne'ebé alkasa tiha ona, hodi nafatin aposta iha infraestrutura transversal no plurianual ne'ebé sei permiti dinamiza economia não petrolífera no aumenta sustentabilidade ba ita nia projetu desenvolvimento. Nune'e mós iha setor sosiál no melloria prestasaun serbisu ba povu, sai nafatin objetivu importante ba Governu ida ne'e.

Tamba ne'e, Governu sente satisfeito ho debates iha Komisaun Eventual, tamba konsege acomoda proposta alterasaun orsamental, barak, liu husi ajuste internu iha instituisaun ida-idak, hodi la sakrifika reserva kontinjénsia ne'ebé sei utiliza ba despeza hirak ne'ebé urgente no imprevisível, no mos la prejudica continuidade projetu hirak ne'ebé hahu hala'o ona liu husi Fundu Infraestrutura.

Governu mos sente satisfeito relaciona ho konsensu ne'ebé ita hetan hodi reforsa instituisaun justiça nian, hodi nune'e, iha âmbito flexibilidade ne'ebé iha, bele permiti kontrata assistensia teknika internacional – majistradus, auditores no asesoria teknika seluk – ba Defensoria Publika, Ministériu Publiku no Tribunal sira, hodi mos assegura implementasaun Estatutu Remuneratoriu Majistradu sira nian, no funcionariu administrativo no oficial justiça foun sira.

Aspetu pozitivu seluk ne'ebé mosu husi debate sira iha Komisaun Eventual maka konseje inklui mos funcionáriu Parlamentu Nasional no RAEOA nian iha regime contributivo sosiál.

Aproveita mos atu destaca disponibilidade Parlamentu Nasional nian atu integra Orsamentu Seguransa Sosial tinan 2017, ba OJE 2017. Tamba relasaun ne'ebé iha entre orsamentu rua ne'e, Governu mos konkorda ho prinsipiu unidade no universalidade Orsamentu Estadu nian iha deit lei ida, maski proposta orsamentu Seguran Sosiál, mai nu'udar proposta ketak ida husi Governu, tamba iha tempu ne'ebá Rejime Seguransa Sosiál sei iha hela prosesu aprovasaun no iha promulgasaun.

Excelências, Senhoras e Senhores, Povo Timor-Leste tomak

Hakarak aproveita mos atu fo'o hanoin hikas katak ida ne'e ezersisiu submisaun, debate no aprovasaun orsamentu Estadu ikus-liu ba Governu ida ne'e. Orsamentu ne'ebé Governu submete ba Uma Fukun Murak ida ne'e hetan aprovasaun unânime husi ita bo'ot sira, ilustres deputados, tanto iha generalidade, especialidade, no mos iha final global, hanesan mos tinan tolu ikus-liu.

Aprovasaun unânime ba OJE, ne'ebé sai nu'udar instrumentu jestaun Estadu nian, ida ne'ebé importante-liu, hatudu katak iha Timor-Leste iha konsensu geral ida kona-ba oin-sá hala'o konstrusaun Estadu no konstrusaun Nasaun iha Timor-Leste.

Ida ne'e hatudu mos katak, maski ita iha diverjensia ideias, ita bele serbisu hamutuk demokratikamente hodi konsege hamosu conjuntura politika foun ida ho konsensu politiku ida ne'ebé, wainhira tau hamutuk ho susesu sira seluk-tan, halo Timor-Leste sai nu'udar ezemplu ida, ba Paíz sira em dezvoltamentu, konsensu ida ne'ebé sai mos razaun tamba sá, nasaun seluk haree Timor-Leste nu'udar kazu susesu ida, iha âmbito paiz pós-konflitu sira, konsensu ida ne'ebé permiti lori Timor-Leste ba dalan susesu nian, no lori Timor-Leste ba dezvoltamentu sustentável.

Ida ne'e la'os konsensu ida ne'ebé halo ho intensaun atu fahe Timor-Leste tuir interesse ema ida ka rua ninia hakarak, ka tuir interesse grupu ida ka grupu rua nian. Inefisiénsia, esbanjamento, no korupsaun nu'udar risku ba investimento públiku, bele deit mosu independentemente husi ezisténsia konsensu politiku.

Konjuntura politika no Konsensu Politiku ne'ebé hakiak no haburas hahú tinan 2013, tuir hau nia haree, sai nu'udar ilas ka imagem konkretu husi ita nia bei-ala sira ninia filosofia murak, ne'ebé sai mós baze ba relasaun sosio-antropolójika fetosá-umane, ka filosofia ne'ebé ninia premissa importante maka **"matak ida-idak nian, tasak ona ita hotu nian"**.

Tamba importância husi Konsensu Politiku nu'udar forma ida hodi kontribui ba konstrusaun Estadu, konstrusaun Nasaun no dezvoltamentu sustentável ne'ebé eficaz-liu, no tamba Konjuntura Politika foun ne'e marka ona dinâmica politika nasional ida ne'e konstrutivu, no responsável iha tinan 4 ikus-liu nia laran, permiti atan hau konvida ita hotu atu hamri'ik no basa-liman ba arkitetu bo'ot rua husi Konjuntura Politika no Konsensu Politiku ida ne'e: Maun Bo'ot Kay Rala Xanana Gusmão no Kamarada Mari Alkatiri!!!

Espasu ne'ebé ita hamosu entre ita nia nia diverjensia no diskusaun ne'ebé ita halo, permiti ita hotu hamutuk desidi buat ne'ebé di'ak-liu ba ita nia Povu no ba ita nia Paiz. Hau halo votus atu konsensu ida ne'e nafatin sai referénsia ba Governu sira ne'ebé sei tuir mai.

Maski nune'e, konsensu politiku ida ne'e lori mos responsabilidade ba orgaun soberania sira, la'os deit ba hirak ne'ebé implementa programa no ezejuta orsamentu, maibé mós ba sira ne'ebé iha responsabilidade atu fiscaliza. Ba Governu, unanimidade ida ne'e representa votu konfiansa, hanesan ita bo'ot sira teme ona votu ida ne'ebé VI Governu sei buka atu honra hodi serbisu ho empeñu bo'o liu-tan ba Povu no Nasaun to'o ninia mandatu remata.

Ikus-liu, no tamba karik ida ne'e oportunidade ikus atu pessoalmente koalia ba audiénsia murak ida ne'e, iha âmbito Natal no Tinan foun ne'ebé hakbesik dadauk ona mai, hakarak mós hato'o Votus Natal Kmanek no tinan foun 2017 nakonu ho Matak Malirin ba ita bo'ot sira ida-idak, ba ita bo'ot sira nia família, no ba Nasaun tomak hakuak bo'ot husi VI Governu Konstitusionál.

Obrigadu.

9 de Dezembro de 2016

Dr. Rui Maria de Araújo